



L'IMNI DAL FRIÛL AL SO ESORDI UFICIÂL

Al sarà presentât usgnot, ai 6 di Otubar, l'imni uficiâl dal Friûl: *Incuintri al doman*. Dopo cualchi mê di lavôr intens, la prime esecuzion e vignarà fate intal Domo di Lignan, aes 9 di sere, in ocasion dal concerti de Mitteleuropa Orchestra.

Prime di cheste opere, in maniere significative, e vignarà eseguite la Novesime sinfonie di Beethoven, che e conten l' "Imni ae gjonde", che al è l'Imni de Europe Unide. La esecuzion vocâl e sarà dal Coro del Friuli Venezia Giulia, diret dal mestri Cristiano dell'Oste.

Chest al sarà l'at conclusif di un progjet promovût dal Istitût Ladin Furlan "Pre Checo Placerean" e dal Messaggero Veneto, in colaborazion cu la ARLeF. Il toc vincidôr dal concurs al jere stât anunziât in ocasion de Fieste di Patrie dal Friûl, che si è tignude a Voleson Darzin intal Avrîl stât.

«O vevi tal cjâf cheste melodie za di un pâr di agns – al à contât il composidôr, Valter Sivilotti, autôr des musicis -. Mi pareve significative pal nestri teritori e une vore "intonade" cun lui. Mi soi confrontât cul leterât Renato Stroili Gurisatti che al à condividût la mê prime impression. Cussi, tal moment dal Concors organizât de ARLeF, o ai presentât la composizion che e je plasude ancje ae jurie. Un imni al à la sô metriche e mi pâr di vê lavorât suntun teme nobil, cuntun andament mitteleuropean che al caraterize, di tancj decenis, cheste nestre region».

Il toc che, pe part testuâl, al è stât scrit di Renato Stroili Gurisatti, al veve fat nassi une emozion grande inte jurie di esperts che lu à sielt tant che il miôr fra i 10 presentâts, marcant che "la musiche e il test si integrin a vicende, midiant di une scriture vocâl e strumentâl di grant respîr e di slanç di cjant potent".

Intai dis che a vegnin a saran disponibii par ducj i spartîts in 12 declinazions (orchestre, bande, corâls...), di podê doprà intes occasions uficiâls li che lis comunitâts furlanofonis a son cjapadis dentri e si podarà scoltâ l'audio de esecuzion sul sît www.arlef.it.

Imni uficiâl dal Friûl Incuintri al doman

In alt o fradis, o int di Aquilee,
 devant da la Storie, di front dal doman.
 Sin flame che e vîf pes stradis dal mont
 sin non di une Patrie, sin fîs dal Friûl.

Scolte o Friûl, o tiere di libars,
 di lenghis e popui sês cjase di pâs.
 Dai secui i paris nus clamin adun
 a fâsi lidrîs di un unic destin.

In alt o Friûl, o Patrie mê sante,
 di fuarce e sperance si viest la tô int.
 Un popul sigûr che al cjamine te lûs
 incuintri al doman, incuintri ai siei fîs.

MUSICHE **Valter Sivilotti**

PERAULIS **Renato Stroili Gurisatti**

